

Jean Haritxelharrek erosi du Leizarragaren biblia enkantean


Euskaltzainburuak Lotoan irabazitakoari esker ordaindu zituen 166.500 librak

Jean Haritxelharrek Euskaltzainburuak erosi du Leizarragaren 'Jesus Christ Gure Iaunaren Testamendu Berria-ren' lehen edizioa. Haritxelharrek otsailaren Lotoan irabazi zuen diruari esker erosi ahal izan zuen obra joan den martxoaren 15ean Londresen, berak azaldu duenez. Bere karguak utzi eta atzerrira bizitzera joateko asmoa agertu dio EGUNKARIARI.

LUTXI GOROSTIAGA / BAIONA

Leizarragaren biblia Euskal Herriatik urrun joango zen kezka zutenek lasaitasun handia hartuko dute, gure tartean egonen baita. Jean Haritxelharrek joan den otsailaren 25eko Lotoan irabazitako diruari esker martxoaren 25eko enkantean erosi ahal izan zuen, nor zen isilean atxikiz, orain azaldu duenez. Hala ere «sekreto handiak ezin gordeak» direla adierazi digu Haritxelharrek, eta Baionako Euskal Erakustokian erakusgai ezartzeko asmoa duela gaineratu digu. «Milioiak irabazi nituela jakitean ez nuen sinetsi. Hala ere, hastapenetik aberastasun hori euskal kulturaren alde baliatzea pentsatu nuen, eta Leizarragaren liburuaren saltzea sekulako xantza iduritu zitzaidan. Egun esku onetan dago eta Baionako Erakustokia paratzen dutelarik harat eramatea pentsatu dut».

Hala ere Haritxelharrek «diru



Euskaltzainburu kargua utzi eta Ameriketarako bidea hartuko du Haritxelharrek.

EDURNE KOCH

poxi bat oraino» baduela azaldu digu eta beste proiektu batzuk ditu buruan. Tunisian egon berria da emaztearekin bakantzetan iragan hamabost egunetan, eta «pentsatzeko denbora» hartu du.

Iragan larunbatean Pizkunde-ko lehendakaritza laga ondoren, «Euskaltzaindiko kargua uztea» ere erabaki du, atzerrira joan baita. «Nire birraitonaren kusi bat Kaliforniako Okaiwa eskualdean izan zen artzaingoa eta familia zabala egin zuen han. Hamalau etxaldeko eskualde hartan euskara ongi ikasia dute

eta egun beren seme-alabek eta ondorengoek bide bera segitzea nahi dute». Horretarako Okaiwan haurrentzako ikastola moduko bat antolatzea du gogoan Jean Haritxelharrek, baita helduentzako alfabetatze eskola bat ere. «Euskal kultura ireki eta mundializatu behar dugula erraten dute batzuek. Nik, aldiz, munduko kulturak euskalduntzea proposatzen dut».

Jean Haritxelharrek ez daki zenbat denborako joan litekeen Ameriketara, baina «Euskal Herriarekin loturak atxiki nahi» dituela argi utzi du. Euskaltzain-

diari buruz, «euskaltzainburua Ipar Euskal Herrikoa izaten segitzea atsegin» lukeela azaldu digu, eta Beñat Oihartzabal «hautagai ona» litzatekeela gaineratu du.

Azkenik, aspaldian utzia duen pilotari berriz ekitea gogoko lukeela aitortu digu eta Ameriketara horretarako astia izanen duela. «Kalifornian trinket bat eraikitzeke asmoa dut, herri guztiak ikas dezan pilotan. Eta 'Atxik Baigorri' izena ezarriko diot gainera, gure herriko rugby taldearen omenez», erran digu irribarretsua.

Gaur arratsaldean euskararen alde giza katea egingo da

GASTEIZ

Euskaltzaleon Elkargu-neak deituta, gaur arratsaldeko seietatik aurrera euskararen aldeko giza katea egingo da Gasteizko erdialdeko kaleetan. Giza kate hau Andra Mari Zuriaren enparantzatik abiatuko da. Antolatzaileek adierazi dutenaren arabera, «Arabako euskararen aldeko ilusioen plazaratzea» da ekitaldi honekin islatu gura dutena. Giza katea, bestalde, 'Arabarrok Euskarari Bai' lelopean egingo da.

Ekitaldi honetan parte hartzeko deia egin dutenei gagozkiela, Araban euskalgintzan diharduten hainbat taldek adierazite du dagoeneko beren sostengua, eta, Hitzarmena ekimenaren ildotik, «positiboa, alaitua eta zalapartatsua» izango den giza katera joateko eskatu diete euskaltzale guztiei.

HBk ere bere sostengua adierazi dio ekitaldi honi. HBren ustez, gainera, azken egunotako «ika-miken» ondotik «euskaltzaleon erantzuna beharrezkoa» da. Zabalduko mezuan irakur daitekeenez, «bi helburuekin bat dator HB: batetik, jaiarekin eta ospakizunarekin, Arabak hizkuntza normalizazioaren aldeko jarrera erakutsi duelako; eta bestetik, salaketarekin, eztabaida honetan guztian zehar entzun direnak euskararen aurka erasoaldi gogorrak baino ez direlako izan».

Errepresalien beldur dira Iruñeko kartzelan baraualdia egin duten presoak

T.S. / IRUÑEA

Jasaten ari diren egoeratik protestatzeko egindako baraualdia bart gauerdian amaitu zuten Iruñeko kartzelako 108 presoak. Baraualdiarekin batera normalean espetxe barruan egin ohi dituzten zenbait ekintza egiteari ere uko egin diote aipatu preso hauek, protesta moduan. Orain, errepresalien beldur direla azaldu zuten atzo Pedro Mari Nieto preso ohiak eta Santi Lesmes Salhañetako kideak.


Alde honetatik gogoratu zuten orain arte protestaldiak eta ekintza erreibindikatiiboak intsumisoek soilik egin dituztela, «eta errepresalia moduan parteak ipini eta beste kartzela batzuetan sakabanatu zituzten». Preso so-

zhalen kasuan egoera okerragoa dela zioen Nietok, «intsumiso bat beste espetxe batera eramaten badute ere laguntza eta elkartasuna izaten du bertan, kontzientzi presoak direlako; sozialek, ordea, bakarrik eta baldintza txarragotan egoten dira». Gogoratu zuen joan den Sanferminetan patiora ateratzea debekatu zirelako zerbait esan ostean bi preso sozialek trasladoa jasan behar izan zutela.

Bestalde, espetxe barruan izaten diren tratatu txarrei buruz ere mintzatu ziren, azken hila-beteetan 5 salaketa izan direla aipatuz. «Askoz gehiago izaten dira, baina presoek beldur handia dute eta ez dute salatzen». Tratu hau, gainera, gaixo dauden presoekin berdina izaten dela azaldu

zuten; «espetxean gaixoturik sartzen direnek ez dute tratatu hoberik jasotzen, ez janarietan ezta beste neurri batzuetan ere. Hau neguan, gainera, hozkailu bat da, guztientzat».

Asteburuan kolpatutako bi presoak, berriz, kartzelan daudela esan zuten, zein egoeratan dauden ez zekitela esan bazuten ere. Drogari buruz, berriz, espetxeko zuzendaritzak ez duela xiringak sartzen uzten azpimarratu zuten, «kartzelan drogarik ez dagoela diote, beraz, ez dagoela xiringen beharrik». Metadonaren programa, berriz, oso ongi doala zioten, «jendea lasaiago dago». Hala ere batzuek ez dute programan sartu nahi izan. Guztira, ia presoen erdiek drogarekin zerikusia dute Iruñeko kartzelan.



Kartzelako «egoera kaskarra» salatu nahi izan dute.

JOXE LACALLE